



Broj: 05-05-35214/16 ZJ
Sarajevo, 06.03.2017.g.

SKUPŠTINA KANTONA SARAJEVO
- OVDJE -

n/r Ana Babić, predsjedateljica

PREDMET: Dostava odgovora na zastupničko pitanje

Zastupnica Neira Dizdarević je na 24. Radnoj sjednici Skupštine Kantona Sarajevo, održanoj 28.12.2016. godine, u okviru tačke Dnevnog reda "Zastupnička pitanja, inicijative i odgovori", a u skladu sa Poslovnikom Skupštine Kantona Sarajevo, pokrenula zastupničku inicijativu:

"Inicijativa se odnosi na ponovo aktuelan problem - problem zagađenosti zraka, koji se ponavlja iz godine u godinu. Koncentracija štetnih materija i ovih dana prekoračuje sve dozvoljene granice. Pokrećem inicijativu da Vlada KS hitno oformi ekspertni tim koji će napraviti dugoročnu strategiju, konkretne projekte i plan aktivnosti za rješavanje problema zagađenosti, da nam se već i iduće zime ne bi ponavljao isti problem".

ODGOVOR:

Temeljni dokument u kojem su definisani pravci djelovanja u oblasti zaštite zraka u Federaciji BiH, pa i Kantona Sarajevo predstavlja važeća Strategija zaštite okoliša, čiji je sastavni dio i Strategija zaštite zraka.

U tom smislu neophodno je kontinuirano smanjivati emisije zagađujućih materija u zrak iz energetskih i drugih industrijskih pogona i postrojenja, kao i emisije iz stambenog sektora i sektora transporta, i to tehnološkim osavremenjavanjem, korištenjem ekološki prihvatljivih energenata i obnovljivih izvora energije.

U funkciji prevencije, potrebno je uvažavati kvalitet zraka kao jedan od važnih parametara prilikom prostornog planiranja i gradnje novih objekata različite namjene, posebno pogona i postrojenja koji mogu imati negativan uticaj na okoliš.

Ogroman prostor za smanjenje zagađenosti zraka, prema Strategiji, čini povećanje energetske efikasnosti, jer se na taj način štedi toplotna, a i svi drugi vidovi energije.

Ciljevi Federalne strategije zaštite zraka su involvirani u Kantonalni plan zaštite okoliša koji je bio na snazi do 2012. godine.

Inače, KEAP se usvaja u skladu sa članom 49. stav 6 Zakona o zaštiti okoliša ("Službene novine Federacije BiH" broj 33/03 i 38/09) kojim je propisano da „Skupština Kantona donosi Kantonalni plan zaštite okoliša za razdoblje od najmanje pet godina“, dok je članom 4. Zakona o zaštiti zraka FBiH ("Službene novine Federacije BiH" broj 33/03 i 4/10) propisano da "Kantonalna zakonodavna



tijela donose Kantonalne planove zaštite kvaliteta zraka na period od najmanje pet godina, kao dio Kantonalnih planova zaštite okoliša i koji imaju za cilj poboljšanje kvaliteta zraka“.

S tim u vezi Ministarstvo prostornog uređenja, građenja i zaštite okoliša je pristupilo pripremi novog Kantonalnog plana za period 2016 – 2021. godine. Projekat realizuje Konzorcij u sastavu Institut za hidrotehniku i Enova Sarajevo, a proces realizacije prate dva oformljena tijela i to Komisija za stručno sagledavanje izrade KEAP-a i Savjetodavni odbor u kojem su predstavnici drugih resornih ministarstava, općina, kantonalnih ustanova, javnih komunalnih preduzeća, te nevladinog sektora. KEAP predstavlja ključni strateški dokument kojim će se identifikovati problemi, te utvrditi prioritete i aktivnosti u svrhu poboljšanja stanja, između ostalog i kvaliteta zraka u narednom periodu. Do sada su održane 3 radionice, urađen je Izvještaj o stanju okoliša na bazi prikupljenih podataka, a trenutno se razmatraju nacrti akcionog plana kojim se definišu ciljevi, prioritetne mjere, nosioci aktivnosti, potrebna sredstva i indikatori praćenja uspješnosti provedbe istih. Uskoro će biti održane stručne rasprave na koje će biti pozvani predstavnici univerzitetske zajednice, stručnih institucija, privrede, općina i nevladinog sektora na kojima će se diskutovati o pripremljenom i Akcionom planu u segmentu zaštite zraka. Prema Programu rada, Kantonalni plan zaštite okoliša će biti sredinom juna razmatran i na Skupštini Kantona Sarajevo.

Dakle, strateški dokument je već u izradi, koja se odvija na vrlo transparentan način i uz široko učešće zainteresovanih i stručnih lica i institucija.

Neovisno od Kantonalnog plana zaštite okoliša, obezbijedeni su ili je u toku izrada i drugih strateški važnih dokumenata za ovu oblast. Budući da je monitoringom kvaliteta zraka, proračunima i matematičkim modeliranjem, ustanovljeno da u Kantonu najveći problem predstavljaju čvrste čestice, koje u zimskom periodu višestruko premašuju dozvoljene vrijednosti, u saradnji sa stručnjacima je izrađen Akcioni plan za smanjenje čestica, koji je usvojila Vlada Kantona 16.04.2013.godine. Plan, čija se implementacija treba poboljšati, sadrži ocjenu stanja, definisanje ugroženih područja, uzroke zagađenosti zraka, opis aktivnosti sa nosiocima i procijenjenim troškovima za njihovu realizaciju. Pored više različitih projekata vezanih za monitoring i kontrolu zagađivača zraka, o čemu se informacije mogu naći na web strani Ministarstva, u završnoj fazi je izrada Strategije energetske efikasnosti javnih objekata Kantona, kao i Akcionog plana, koji se rade u saradnji sa UNDP-jem kroz projekat "Zeleni ekonomski razvoj". U 2016.godini je Vlada Kantona usvojila, na prijedlog Ministarstva, Odluku o obaveznom unosu podataka i redovnom izvještavanju korisnika o potrošnji energije i vode u javnim objektima Kantona Sarajevo ("Službene novine Kantona Sarajevo" broj 36/16). Uskoro se očekuje i podrška UNEP-a u BiH (Program UN za zaštitu okoliša) za izradu Studije unapređenja daljinskog grijanja i provjera izgradnje tzv "kvartovskih kotlovnica", a sve s ciljem smanjenja broja malih ložišta, a samim tim i emisija u zrak.

Paralelno se radi i na pripremi projektnih ideja za apliciranje na sredstva evropskih fondova u saradnji sa inostranim partnerima, kako bi se preuzele dobre međunarodne prakse, te osigurala nedostajuća sredstva.

I svi projekti koji se realizuju na izgradnji i rekonstrukciji saobraćajne infrastrukture i saobraćajne politike u cjelosti će doprinijeti smanjenju zagađenja zraka.

U svakom slučaju strateška opredjeljenja su poznata, ali je ključni problem njihova primjena i odsustvo odgovornosti za kontinuiranu brigu o kvalitetu zraka (a ne samo u posebnim situacijama) i to svih segmenata društva, od Federacije, Kantona, općina, privrednih subjekata, građana.

Naravno, na prirodne uzročnike pogoršanja kvaliteta zraka, u zimskom periodu, kao što su temperaturne inverzije, nedostatak vjetrova, pojave magle, a i morfološka pozicija Sarajeva, ne može se uticati. Ali se može stalnim koordiniranim naporima i jasnim politikama i uz izdvajanje



značajnih finansijskih sredstava i jačanjem administrativnih i stručnih kapaciteta, stanje značajno popravljati.

MINISTAR

Čedomir Lukić, dipl.ing.arh.

Dostaviti:

- Naslovu
- Arhiva



web: <http://mpgz.ks.gov.ba>
e-mail: mpz@mpgz.ks.gov.ba
Tel: + 387 (0) 33 562-029, Fax: + 387 (0) 33 562-031
Sarajevo, Reisa Džemaludina Čauševića 1

